

'una tacau miaa aravari

aracan usupatu muna cenana miana. 'una meesua niarisinata cau Huran(荷蘭). kaNamasia cau meesua ia, 'inmaamia Kanakanavu. sua niarisinatua Nakasayana ia “簡仔霧” kisun. sua Kanakanavu aranai kara ngaca'ua masiraru 'esi cu nesi? makai ka'anu. kacula cu mamarang tumatuturu kitana. miana nimoon kita na 'unai Nacunga. nakai noo kesoni pa, 'esi nanu sua Nacunga? 'inmaamia makasi, 'esi na tararakaua taniaru. nguai sua kisaa tungfang. sua isi ia, 'esi na kangangaan mamarang tamna cupungu.

meesua na to'unaa iisua, niarakacaua cau cucumeni. makai kani 'esi cu 'atipian sua siacuvuru. maruaru cu aracakana marukurapu. noo tiain arakanu ia, tia cu muraceni, masii 'una araa. 'una makaan. cani cupunguana arakukunu arakanu. makai miana, marivici tacau tia 'uma'anupu. mukusa araceni koo pa tinukusaa miana. moon na taira miaranau ti'ingi. 'una ucani tacau kamanumanu tamtitu. miaa tarasangai cu arakanu. tacau cina mataa tamtitu, ariviciun kavangvang pui'i tanasa.

nguai sua to'unaa meesua 'unai Nacunga. nakai sua tacau cina mataa tamtitu, takacicini pui'i na tino'unaa kamanumanu. cani cupunguana iisua,

mukusa 'inia mapui'i marivici tanasa. nakai, maka'unu pa tacau manguru.

makasua pupui'i makatumuru cu. cani cupunguana iisua pacupungu cu, manasu 'esi 'apaica tacau sumasakiri tumatuturu. makasuin kipapa kita tacau aravari 'inia misee cu. makasua cu, cau cucumeni marivici cu cani pininga aravari 'inia. niarakacaua cu cau, tuiisua cu tanasun tatia. patanganai Na'usurana kisun. sua 'imi in ia, paira kani 'una 'uvu. sii tantaniara 'una cau 'esi 'inia matu'apuru tia po'ucipi. kakangea 'inia, makacumuru cu 'uvu.

sua 'una isi 'unai Na'usurana ia, nguai sua to'unaa Kanakanavu masini Namasia, nganai Nakasayana ia “藤芭山” tamna ciciri. noo muciri kita na Namasia tamna pipiningi ia, aratakaru navungu cumacu'ura, tarakusun cu cimuru iisua. nanmarua nanamu mita. 'una makasi, sua cimuru iisua ia, Kanakanavu tamna “tamutamua cimuru” kisun.

sua 'una isi, 'una kavangvang niarisinatua na Ripuun citai tamna sinatu.

(文章大意 僅供參考) ※字數限 200 字

遷徙傳說中的獵狗

近四百年前，那瑪夏區的住民當時是叫「簡仔霧」。以前曾經住在 Nacunga 之地，太陽出現的東方，這是長輩們共同的記憶。

當時聚落愈來愈多，形成生活壓力。獵物逐漸減少。有次，一個家族性的集體狩獵，其中有一隻母狗生了幼狗，狩獵結束後，要將母狗和幼狗帶回 Nacunga 之地。但是，母狗卻帶著幼狗跑到幼狗出生地，這可能是獵狗的啟示，就搬過去住形成聚落 Na'usurana，意指常有濃煙的地方。Na'usurana 就是「藤芭山」的周邊，在那瑪夏區室外抬頭，就會看到那座山。